

四庫全書

集部

欽定四庫全書

文苑英華卷九百八十三

宋 李昉等 編

交舊六

祭包秘監文一首

祭呂給事文一首

祭梁補闕文一首

祭韓祭酒文一首

祭盧華州文一首

祭戶部崔侍郎文一首

祭獨孤常州文一首

祭獨孤台州文一首

祭張工部文一首

祭賈魏公文一首

祭唐舍人文一首

祭杜岐公文一首

祭秘書包監文

權德輿

維貞元八年歲次壬申五月朔日故吏部員外郎蕭存  
太常博士權德輿大理寺丞王純等謹以清酌庶羞之  
奠敬祭于故秘書包七丈之靈在漢鴻臚蔚為名儒以  
續簪裾乃生秘書純誠伉直古訓是式納忠宣力有勞  
王國昔自秀造翰飛扶搖彌綸劇曹領袖清朝出入諷  
議嘉聲孔昭道集作昭塞時通乃領藩條俄復郎署俾均

繇賦經費委輸待公而具受命匪躬于汴之東秩宗之  
貳司憲之雄鑿輅時巡闕梁永通每以貞勝行於險中  
登賢求舊入佐司寇中和直清望與實并乃惣師氏三  
德興行又領秘丘六藝章明偃息文囿優游漢庭雅韻  
拔俗清機入冥立言大旨為經為紀行中集作中行文質不  
華不俚魯史一字詩人四始泝其源流用制頽靡以誼  
藩身與道為隣虛中皎然不棲緇塵動靜專直儀刑縉  
紳得喪虧成靡滑吾真宜介遐福宜受戩穀未及下壽

胡為不淑遺孤藐然銜恤茹毒善慶不誣期於必復某  
等劣薄嘗承討論通世宿好嘉招厚恩舞雩春遊昔實  
童子峴首良會俄叨知己歲月遄邁或行或止慰薦難  
忘音徽不已各忝官命

集作  
一官

來歸帝里話舊語新悲歡

未幾驚疾厲之潛溝冀無妄而有喜信宿之間格言在  
耳精識不亂達生大觀謝醫禱於門人順一氣之聚散  
大鈞無期化往何之邦國殄瘁古今悽其虛室寥寥德  
惟披披哀從中來雪涕交揮柔嘉列籙清沾

集作  
酌

滿卮

神之聽之噫嘻格斯尚饗

祭呂給事文

前人

維貞元九年歲次癸酉正月庚申朔二十一日庚子右  
諫議大夫陽城給事中徐岱李衡中書舍人奚陟尚書  
駕部郎中知制誥張式左補闕權德輿謹以清酌庶羞  
之奠敬祭于故給事中呂公之靈君子之道貴乎艱貞  
公用踐履剛中粹精文學政事蔚然時名出處屯夷用  
晦而明命佐戎車

集作君  
命佐戎

于彼淮甸方國多虞妖氣

一作

氛潛煽每以明誠冀其革面外蒙耻以枉尺中飛章而告變白刃臨前丹心炳然貞其困而後濟忘其生而後全殺沴既平忠勞亦著草奏南宮嘉聲載路出領符竹澄清遠部夕拜黃扉昭宣王度獻歲朝天侍立君前華纓玉珮行止鏘然周旋陟降接踵差肩如何不日奄闕重泉嗚呼哀哉寓形此世無非大夢寢門之外莫甚斯慟交歡幾時踰月于茲每冀休沐相從讌私孰謂奄忽俄生癘疢醫禱不及形神已離某等或辱在嘗

集作察

或忝陪下列嘉

集作喜

雲霧之初披恨幽冥

集作明

之遽訣

瞻彼塗芻言旋洛都平昔志

集作智

氣復歸虛無酒散靜

嘉盈俎滿壺何以道意潛然涕濡尚饗

### 祭梁補闕文

前人

維貞元九年歲次癸酉十一月朔日左補闕權德輿等

謹以清酌庶羞之奠敬祭于故右補闕贈禮部侍郎

集作

郎梁君之靈我思古人乃得敬之今則不見嗚呼噫嘻

賢哲之生作瑞于時中立不倚大道甚夷人或多方以



取世資君懼其至泊然靈龜游夏遠矣文章運衰風流  
不還作者蓋希君得其門獨泝澆醜遐蹈古始六經為  
師初冠章甫在江之許忘形交臂或出或處久要之契  
煦然相與直諒切劘曠懷無沮漢庭虛左尺一旁午心  
與雲閑翼隨風舉恬漠虛白環中之樞篤厚誠明君子  
之儒精義入神英華發舒人所景行君之緒餘乃補衮  
職乃侍皇儲北宮密命東觀直書致用無方迎刃皆虛  
漸漬教化闇然而孚文武憲章堯舜典謨空結時望莫

申令圖宜錫華皓以極其道鍾美實多歸全太早子淵  
之仁叔度之賢皆厚其才而奪之年吁嗟敬之今亦已  
焉孰司化工不與其全凡我同人官次周旋微言嘉話  
恍若目前吾欲問蒼蒼而訴冥冥索夫子於重泉末如  
之何從古以然平生一樽哭奠靈筵魂氣何往空傷絕  
絃尚饗

祭韓祭酒文

前人

維貞元十年歲次甲戌三月朔日徵事郎守左補闕權

德與謹以清酌庶羞之奠敬祭于故國子祭酒韓十四

丈之靈伏惟德厚流光炳靈發祥傳慶於

集作于

公鬱為

珪璋宣力中外道光明代動必有裕直而無悔從容諫

垣密勿絲言炳然憲章潤色化源天

集作六

官之貳京劇

之貴四方取則九賦不匱蓬山秘書大學遵儒選重前

代非賢勿居率是明德便藩右職宣其馨香昭其物則

四科難並全才乃克利用無方沛然餘力再世金鉉確

乎匪躬光輔帝道是為門風緇衣棣華宜復於公終缺

人望天乎不備顧惟小子夙承先友骨肉之契歲寒逾  
久爰自齟州深仁善誘恤此殘生均其所有衣而食之  
祿而仕之闔門仰給纖悉無遺仁惻之道曲盡其宜二  
十年間完安保持比肩多士忝跡清時必由念慮敢不  
知思秦原蒼蒼丹旒遲遲精魄何往音容莫追沉哀激  
中雪涕交揮神鑒如在含酸託詞尚饗

祭盧華州文

前人

維貞元十六年歲次庚辰四月己巳朔越八日景子從

表弟朝議郎守中書舍人雲騎尉賜緋魚袋權德輿謹  
遣使以清酌時羞之奠敬祭于故華州刺史御史大夫  
盧六兄之靈詩謂君子溫其如玉書稱正人既富方穀  
明靈比德清議所屬未極全才如何不淑追憶曩歲鍾  
陵嘉招兄時左遷屈佐乘軺幕庭山郭並榻連鑣心同  
則親敢曰嘗集作常察俄奏郡課復升郎位左掖斯密教  
官已貴殘骸被病土梗蓬累謝交辟以未能方屏居以  
自遂拔茅推轂遐輸集作蹈古義七發粲然八行狎至詔

下江干猥登禮官故

集作顧

蓬茨之鯁生忽束帶於朝端

遐日良夜清言舊歡再披雲霧永契金蘭帝念長人出

臨左輔河澆襟要復此居部乃亞丞相金龜映組美利

休聲和風甘雨弱植何幸累叨禁垣諫曹

集作署

右史以

至司言因緣踐履根本推援恐累知人上負明恩一違

晤語九變涼溫日夕音徽切劘討論發函疊疊如見君

子或忠言以規過亦善諛而溢美方

集作冀

登柄用以永

介祉每驟首於公朝期盍簪於仁里俄驚感疾方俟有

喜志切乞身恩深卧理神道與善胡然不起寢門一哀孰甚知已素車莫遂雪涕何已樽酒簞貳深誠在此尚饗

祭戶部崔侍郎文

前人

維貞元十九年歲次癸未十月戊寅十二日己丑中書舍人楊於陵禮部侍郎權德輿謹以清酌庶羞之奠敬祭于故戶部侍郎贈右散騎常侍崔君之靈古之大觀推理以達謂生為勞於化不怛苟非至人哀樂云云一

欣一感松茂芝焚遐想深契在於夫君素履無玷黃中  
有文卓爾堅明皎然貞醇夙以聲實邁於羣倫伊昔官  
遊風塵不雜聯簪法冠並列賓榻夷道可久淡交相合  
亦既府除索然離居或憩循江或旋練湖君初卷懷寓  
彼群舒四年之間集作三年間聯奉詔書分曹士師議禮太  
予中臺奏議並列哀烏道舊放懷話言于于三登首曹  
乃貳師徒相顧飛翻接影天衢顯允德業大僚是都凡  
我四人交歡靡渝直諒是程中庸是經或會公朝猶疑



幕庭孰謂夫子奄然冥冥交臂相失汎瀾涕零入室  
皦孀孤之聲追懷悼心痛我友生密印左貂以哀以榮  
嗚呼哀哉命之所賦豈有其數乃如之人洵美無度常  
日謂我文昌連集作步如何今茲已隔泉路疊疊良話  
依依平素晦明再暮冥冥大暮萬事風燭九泉草露魂  
之來兮歆此薄具尚饗

祭獨孤常州文

前人

維貞元二十年歲次甲申十一月戊申朔禮部侍郎權

德輿謹以清酌庶羞之奠敬祭于故常州刺史獨孤憲  
公十四丈之靈嗚呼德充而位不配才大而年不遐稽  
於賦命從古太息伏惟蘊大雅之愷悌遵六二之直方  
作為文章律度當世燦如日星炳若龜龍施於政事表  
率萬國三郡洽和四方鼓舞而不得弘大志業歿於中  
年豈洪鈞造物使才命相盪先師罕言末如之何伏以  
夫集作先子篤忘形之契小人展無容之敬去世二紀清  
風凜然顧以息女歸公愛子雖不獲逮事而備承家法

况茲菲薄實忝春私辨方之年違難於江徼志學之歲  
伏謁於郡齋典司禮職嘗奉易名之義嚮仰德門令承  
合姓之重話言誘掖造次敢忘德容碩姿髣髴在目自  
為聲舉之舊今則藩楊之歡二孤純孝遺烈鍾美鮮原  
改卜日月有時酒敬靜嘉式薦靈位尚饗

祭獨孤台州文

前人

維貞元二十年歲次甲申十一月戊申朔禮部侍郎權  
德輿謹以清酌庶羞之奠敬祭于故台州刺史獨孤七

丈之靈洪範五福古人所貴伏惟道樞德機涵泳交會  
解龜隱機讌息東吳嗇神而去物累觀化以順天理終  
始貞吉歸全返真不登期頤者十數歲而已可謂康寧  
而壽以至考終命弘條集作條政事遵職居部汴沿淝河  
四為二千石朱轡暢轂所至洽平率誠理身以化封內  
可謂攸好德其所以異者富於義而遠於利以祿直賙  
姻族集作婚以清白遺子孫故即遠之日輒被纜具孤嗣  
藐然以賻布襄事蹈道如是君子以為難介弟憲公提

此文德舍章炳章與三代同風先門友善義比金石猶  
子秀茂申以婚姻引進琢磨居為雅器永懷感悅冀奉  
話言女子有行得奉門訓竟迫道途之阻未申供養之  
禮用此歎慟結於中腸轎車東來大壘斯啟柔嘉清滌  
用寄單誠尚饗

祭張工部文

前人

維貞元二十一年歲次乙酉七月戊辰朔四日辛未禮  
部侍郎權德輿謹遣男璩以清酌庶羞之奠敬祭于故

工部侍郎兼御史大夫禮部尚書張二十九丈

集作兄

之

靈士君子之所以暢其業者文也學也士君子之所以

植其本者正也忠也綽綽工部實由於斯起

集作起

於逢

掖乃執簡記章明義類振起褒貶博物洽聞時稱良史

可不謂文乎誕章成式變禮疑議稽合於古節適於中

羣士屬目一言以決可不謂學乎處燎原盜泉之中不

焚不濡終然違難皎潔貞厲信信權幸惡厥中立一懼

讒鑠遂去清近祕丘十年不得自足可不謂行已之正

乎出疆專對照耀原隰天覆之內無遠近

集作通

君命之

下無險夷再叶翟土乃蘇我索暢威靈於大荒之外啓

手足於野幕之下可不謂事君之忠乎年纔逾耳順官

止貳起部於兄之量二者皆屈彼大耄大僚孰宜之哉

頃陪禁掖俄接仁里觴酒歌詩清言善譔靡日而間彌

年以歡一瞬之間奄成今古以此思哀如何可忘跌傷

左足未任趾步鼓吹臨門涕洟如霰

集作雨

平生風味今

日永訣伏枕口占寄懷斯文尚饗

祭賈魏公文

前人

維永貞元年歲次乙酉十月景申朔二十三日戊午朝  
散大夫守尚書戶部侍郎雲騎尉權德輿謹以清酌庶  
羞之奠敬祭于故司空相國贈太傅魏國賈公之靈覆  
載之間肖形必化惟令德淑問與天壤俱存伏惟以舍  
一之量叶休嘉之運四征授律勳在盟府二揆居中勤  
宣宰政注意體國繫公是圖始自黃綬至于玄衮率由  
坦夷以極光大浩若溟海熙如春臺歸全之日朝野相



弔窮凋戈金鉉之寵可以言貴過懸車貳膳之年可以  
言壽中和博大之度可以言君子知命順化之理可以  
言至人三朝告老終不得請法賻弔祠禮嘉常數鄙薄  
無似辱公之知獎進切劇速茲一紀獲居里閭亟踐堂  
奧拔俗之韻忘年之歡疑在視聽忽成今古嗚呼魏公  
可勝慟耶潔此觴豆奠于冥冥髣髴風采公其降靈尚  
饗

祭唐舍人文

前人

維元和元年歲次景戌正月景寅朔十九日甲申戶部  
侍郎權德輿謹以清酌時羞之奠敬祭于故禮部郎中  
知制誥唐君之靈嗚呼文編行茂才全弱冠知名時推  
雋賢含章振藻金玉在懸緣情放言采組相鮮憶昔淮  
湖與君覲止忘形合志造適通理瓜步邗溝吳山楚水  
芝蘭之室三十年矣君自江左集作左史進居臺郎予叨禮  
官亦忝周行熙春至止休沐相將纔盍簪於上國俄出  
守於遐方盛山雲安風水迢遞屈此二郡俄然半世文

章煥發書札相繼辛酸苦言欵曲嘉惠

集作會

顧我忝曠

愧君淪滯屢封薦章輒以人廢每與公範交脩宿契不  
進不止中心自誓大君繼明元凱持衡方開宣室以待

賈生裁成訓命所謂文炳詔君居之士友相慶遲遲征

軒來自荆門凡我同

集作周非

人載勞夢魂屈指繼日候

集作

侯居西垣不及百里俄歸九原嗚呼文編此痛難言壽

堂野土一別終古平昔風姿杳無處所樽酒簞羹涕零

如雨冥冥之間神其聽否尚饗

祭杜岐公文

前人

維元和八年歲次癸巳三月甲寅朔二十八日辛巳禮部尚書權德輿謹以清酌庶羞之奠敬祭于故太保太傅岐國公之靈伏集作夫惟體溫厚之氣協休和之運五

常用仁九德在寬六朝跋歷三后相公契作司徒爽居太保致位遂志晏閑顯尊極人倫之壽寵備君上之恩禮傳曰行道有福詩曰求福不回考祥視履惟公是已至若尚祥化元保合太和扶遵嘉會將明利澤漸漬於

生民而隱於視聽者可勝道哉早辱招羣仕纔初命頃

沐鴻休職聯大任周旋惠愛僅三十年

集作三十餘年

公府閣

議郊居盛集滄溟沃日之量清廟禮神之器四教五福  
明哲始終話言風采疑在夢想變化糾紛何可勝論常  
日賓榻今茲靈位常日歡言今茲聲淚常日精爽今茲  
魂氣常日鳴騶今茲騎吹永去昭代言歸厚地平生一  
樽拜奠歆敬尚饗

文苑英華卷九百八十三

欽定四庫全書

文苑英華卷九百八十四

宋 李昉等 編

交舊七

祭成紀公文一首

祭杜祐太保文一首

祭李吉甫文一首

祭權相公文四首

祭成紀公文

崔 損

維貞元十二年月日朝議郎右諫議大夫崔損大中大夫行給事中徐岱朝議郎給事中趙宗儒正議大夫守

中書舍人高郢宣德郎守駕部員外郎知制誥權德輿

起居郎韋丹起居舍人楊馮

唐書  
作憑

左補闕歸澄崔邠韋

渠牟左拾遺李肇王中書右拾遺蔣武等謹以庶羞之

奠敢昭告于門下平章事贈太子太傅成紀公之靈龍

為輔臣虞闕四門殷宗審象說代予言建中皇明崔為

文貞嗣德同風俾公登庸運配我唐忠昭我皇君臣合

契聖賢同方乃序五行乃調三光乃作舟楫乃作棟梁

溫裕內淑矜嚴外莊暖若冬日肅如秋霜錯磨瑚璉黼

藻文章鼎不耀彩蘭非振芳疏封慶遠輔族流長祖服  
既纂孫謀更昌跡初泥蟠勢漸雲翔繡衣持斧錦帳舍  
香曾建隼嶺庶察三湘亦倅龍節和柔北荒左曹駁正  
中臺紀綱績徹宸扆恩昇廟堂東西掖垣左右輔弼獻  
納忠讜許謨慎密嘉猷必告內言罔出清廟承天圓丘  
捧日宣子制典鄴侯定律有倫有要惟精惟一功讎必  
舉愛犯斯黜保正懲邪損虛勵實儉能防侈恭能戒一作

戒 暇逸假寐

一作立範

寢門宣力王室鈞軸是秉樞機所發先



平其心後宰於物赫赫天子萬方稟朔寄公鼎鼐授公  
惟幄方資燮贊更致淳樸從籍千畝侍巡五岳福悲下  
壽忠惜永圖勃也厲疾倏焉夢殂皇心軫慟人望嗟呼  
賻贈恩篤褒崇禮殊騎吹咸京龜兆鼎城緄山舊隴太  
傅先塋某等相府僚屬禁闈分職敢辱陶冶愧生羽翼  
馬字疑作容誤龍鱗愛直孔雖不言幸亦有力徹惟啓  
殞執紼俟門真薄單醪羞輕特豚悲實懷德忠何顧恩  
清風令範子子孫孫嗚呼哀哉伏惟尚饗

祭杜祐太保文

鄭餘慶

維元和八年歲次癸巳四月癸未朔九日辛卯銀青光

祿大夫守太子太

少一作

保兼判太常寺事鄭餘慶銀青光

祿大夫守兵部尚書王昭銀青光祿大夫吏部侍郎

楊於陵中大夫守戶部侍郎判度支盧坦朝議大夫守

刑部侍郎充諸道鹽鐵轉運使王播朝議大夫權知禮

部侍郎韋貫之等謹以清酌之奠敬祭于故太保贈太

傅杜公之靈伏惟嶽峙毓德台符炳靈實啟邦傑佐時

文明厚仁保和待物推誠夷道不隔直心無營允釐羣  
官參歷庶務周旋四朝出入三署顧言慎行道在忠恕  
珪組外身江河比度始從卽位職典邦賦重人惜費惠  
恕周布建中之初受命分符報政長州擁節番禺趨俗  
蠻陬是訓是濡既撫淮楚遂荒隋都時當徐方倣擾為  
虞截河鑠流擁滯邦翰統以威重簡于帝俞鎮寧二境  
並建雙旛十萬驅虎指麾風趨任兼文武志尚詩書兵  
賦著典郡政來蘇學該地理識究玄機天寵載加時問

逾積聿來登庸作弼邦國邦計攸掌國機畢畫永貞之  
際宮闈秘隔順皇沉疾奸臣竊職公聽羣位揔已夕惕  
躬宣誥旨捧授金冊一人出震羣邪蕩滌崇秩屢增湛  
恩備錫朝登劍履樂侔金石沐濟良辰宴慰親客朱輪  
紫授疑富盛赫奕戒足思退居高不危國有大計猶將  
來咨才實不器用皆適時位極元老守逾謙卑靈壽方  
賜懸車忽辭冀期頤以遐保遽樂往而哀隨餘慶等早  
忝班行嘗承顧盼仰台庭以增欵臨素車而申奠嗚呼

哀哉伏惟尚饗

祭李吉甫文

武元衡

維元和九年月日某官謹遣某以清酌之奠敬祭于故  
中書侍郎同中書門下平章事贈司空趙國公李公之  
靈元精之和變乎絪縕升為星辰播為賢哲當四序迭  
運克成歲功元德咸宜用彰聖道惟公鍾茂間氣誕靈  
中和圭璧鎮於巖廊宮商備於韶濩經文緯武覩奧知  
微究理亂之源流極天人之涯際洎濯纓清漢鳴珮天

墀出入三朝徘徊二紀嘗思禁掖潤色王猷屬元聖御  
極之初昊天降休之日公內參密命外正戎機竭心膂  
以振皇綱勵精誠以輔立化故得三光離朗九有澄清  
南定勾吳西殲邛僰默運宏略弘宣大猷及公亮采登  
庸予忝台階接武翊戴元首弼諧神人論道罔違恩波  
共浹及公推轂淮海予亦杖鉞坤維俱荷寵駕各從藩  
翰陰隲庶彙惠洽顓蒙化皆窳之人變澆漓之俗聲應  
義激契重情申信誓之言期於沒齒隋宮井絡相去萬

里山水澄鮮烟綿錯峙風傳麗句絨開素鯉金石相投  
鏗然在耳再徵黃霸繼入丹墀啓沃同心歲寒共期運  
屬休明道濟無為星霜八變交態不移或乘春賞花或  
對酒吟詩音容不間讌語忘疲宜保太和克享期頤報  
功于岱岳侍宴于瑤池庭菊有芳朝露尚滋交臂遽失  
瞥如飈馳惜乎時方泰而壽不與噫道行而數竒復淮  
夷之成算雖人亡而事遺軫悼皇情哀纏冊誄瞻彼洛  
土青鳥爰止千里申奠九原同寄撫嵇紹而不孤銘太

丘而無愧嗚呼哀哉尚饗

祭權相公文四首

楊於陵

維元和十四年歲次己亥七月丁丑朔六日壬午尚書  
戶部侍郎兼御史大夫上柱國弘農郡開國公楊於陵  
謹以旨酒庶羞之奠敬祭于故相國贈尚書左僕射權  
公之靈伏以世濟明德天資上才默識中照襟靈洞開  
言成典誥筆落風雷叩寂窮妙神交思來百代遐鷲九  
流兼該傾詞人之藪澤為作者之杓魁粵自童年飛聲



天下論文請益莫非賢者荏苒著服發輝文雅遽徹明  
庭難留諸夏騏驎之步騁於康莊鸞鳳之舞暢於朝野  
望九霄於瞬息指千里於尋常遵曲臺之講肄脩諫省  
之封章帝曰絲綸代予口語詞之頗僻政亦乖阻爾其  
專掌爾必師古亟換官榮屢移星序春泉涌溢彩翰飛  
舞丕變澆訛裁成訓詁六官之貳我踐其五朗鏡高懸  
時髦盡取陶鈞之柄義利求分詭情異態抑有前聞公  
之雅素迥拔群倫知以藏用忠惟愛君將所以懲止誇

競儀刑縉紳豈獨辨是非於毫髮較輕重於逡廵而已  
哉日居月諸或處或出分陝東之憂寄統漢上之師律  
懋官之典雖荷於朝章福善之徵尚期於陰隲如何不  
淑大禍俄鍾方佇朝天之慶翻成夢奠之凶歎人倫之  
殄瘁哀令子之疚窮幸斯文之不泯將千載之為宗於  
陵爰自壯年獲承嘉惠以蕭蘭之菲質荷松柏之深契  
鍾陵携手禁掖連袂講德談玄依仁遊藝平生之恨尚  
嗟離別之多零落之悲何堪衰暮之際嗚呼謀及龜策

言旋洛師風淒晚籟霧偃靈輶投淚舉酒升階致詞儻  
交情之不昧實神鑒之來思尚饗

二

李直方

維年月日中散大夫試太常少卿上柱國李直方謹以  
清酌庶羞之奠敬祭于故三丈相公之靈天作雷雨山  
川出雲帝思理平英髦並生爰自弱歲植此休德弘重  
不器仁聲淵塞旋昇外臺乃居察視輔人成化入為右  
史文學溥博德度謙沖載領絲言粉澤天工詞簡理詣

燦然昭融俾國家詔命上逾十代與周漢同風爰登禮  
曹實司選士人罕其再我三專美雄文懿行善價端顯  
士昂周行鱗集麇至

一作聚

朝推厥德乃作天官庶職惟

允九流序焉帝念儲皇輒居調護九法闕理乃遷兵部  
禮樂不綱斯為奉常神人以和騫飛廟堂鼎飪三載萬  
方咸賴退為宗伯碩望彌赫惟梁思理建節來萃教化  
惠和流庸洽至憶昔攸往火旗雷靡今也來思白馬龍  
輶哀笳凝咽以增感丹旒悠揚而獨飛嗚呼哀哉直方

昔在南宮擢遷綸閣提携推薦忘其菲薄顧庸淺而難  
持竟鴻飛而終却今佳城行啓哀挽徐吟跪靈筵而號  
慟淚橫墮而不禁伏惟尚饗

三

王仲舒

維年月日從姨弟使持節蘇州諸軍事守蘇州刺史賜  
紫金魚袋王仲舒謹遣某人以清酌之奠敬祭于故山  
南道節度使贈尚書左僕射權三兄相公之靈惟靈天  
受全氣早挺文學用道以直閑邪存誠心常坦夷而不

離法度操本堅峻而盡歸忠厚自拂衣登朝周歷清重  
靜專一節造次於是內翊皇極外擁麾旄賢哲極致天  
下榮觀豐祿足以肥家雄文可以潤屋而奉已彌約素  
風逾鮮顯昂山立以鎮浮俗嗚呼公之德也公之器也  
壽享期頤猶謂之夭况相遠乎論道上庠猶謂之薄况  
不至乎哀哉仲舒及冠之年情契深至非求道之要不  
為辭端非為文之蹟不著心本雲路盡相致之誠閒宴  
諧道舊之適音容如覩書札尚新靈儀宛然驟隔今古

局守遠郡臨慟無因敬薦酒榖用申平昔尚饗

四

蕭 籍

維年月日門生義武軍節度使行軍司馬文林郎檢校  
尚書戶部員外郎驍騎尉賜紫金魚袋蕭籍謹以清酌  
之奠敬祭于前相國故山南西道節度使檢校吏部尚  
書兼興元尹御史大夫贈尚書左僕射之靈伏惟明靈  
稟天地網緼之和為唐虞文武之臣宜乎壽登期頤福  
如崇山安危所注意致大君於三五之上如何昊天壞

我梁木承訃之日縉紳失望豈喬

疑作

終塞歌

疑

謝興

謠輟相之足云乎信無等級以寄言也嗚呼哀哉公昔  
在貞元實司文衡等申者七十有二人惟籍鯁生名不  
聞於將命者公以至公俾居選中數仞之墻得門而入  
荷此知已與嵩華為輕矧乎侍立班墀常趨後塵退食  
台庭亟承嘉言昔之少別今成永訣哭寢之慟百身可  
贖嗚呼哀哉伏以天子有命司戎使車三請會葬元侯  
不許既不得見曳杖之日又不得見如斧之封思欲如



赤為志如賜築室邈乎其不可及已身寄於燕趙之交  
神馳於涇渭之表瞻望遐路心悽目泣其可及乎所可  
慰者臧孫有一作後載揚載顯期在茲日以此忍哀齋  
心遣使儻神理之來顧庶至誠之上達嗚呼哀哉尚饗

文苑英華卷九百八十四

欽定四庫全書

文苑英華卷九百八十五

宋 李昉等 編

交舊八

祭劉僕射文一首

祭顏太師文二首

祭袁給事文一首

祭鳳翔張相公文一首

祭李相公文一首

祭福建鄭大夫文一首

祭楊郎中文一首

為留守鄭侍郎祭劉僕射文

穆 負

維年月日某官謹遣某乙敢用少牢之奠致祭于故尚  
書左僕射彭城公之靈巨唐中否八葉嗣興天為生公  
為公啟運公受天所授事與時并寔為鄰侯立我王國  
于時方夏之內痍傷未平兵餘於人賦倍於產公施以  
損益權其重輕自我竭心為國強力歲歎靡瘠師興忘  
勞羣帥不虔怙兵自擅典章靡及職貢莫脩律我清明  
徵令如饗疑作響凡所辟選府傾時賢若金我礪若玉我  
琢爾材我器爾用我功至今會計之司食貨之政法公

之法其事集吏公之吏其利興守公之成揚公之盛孰  
云公歿吾謂公存嗚呼何日不夕何榮不落何亢不悔  
何高不危終沒裔夷凡伯稱嘆皇明昭滌丹旒言旋澤  
及九原魂歸萬里大名備禮返葬故丘哀哀遺孤銜恤  
靡至毀隣於滅必復是徵某昔官南宮嘗參末吏玉音  
如在哀挽長違祇命禁省不敢離局禮闈執事悲儲永  
懷敢以精誠寄於祖奠神遠聽邇庶乎降歆嗚呼哀哉  
尚饗

為淮西宣慰使鄭右丞祭顏太師文

前人

維年月日某使某官某奉勅以清酌庶羞之奠致祭于  
故太師贈司徒魯公之靈嗚呼天有晦明人亦理亂當  
其厄運則有盜臣至乃憑寵肆兇竊權構逆地吞虎噬  
擇肉中州天子思所以解將燎之焚拯方割之墊遵開  
景命銷遏亂源惟公道冠四朝位先百辟望安社稷名  
動神祇期以日照天臨風清雨滌受命以出視途疑如

歸嗚呼肇有君父孰如堯舜臣惟共鯨子亦朱均稟沴  
而生雖聖勿化父不能得之於子君不能得之於臣矧  
夫禍亂之興蓋乘中否天之方稔公若之何獨立虜庭  
卒致君命激昂大義潛草羣心全道為全天年非夭期  
頤非壽得死為終惟彼兇殘殲我明哲罪均僭逆怒發  
天人否閉未通鬱翳茲久上帝厭亂忠臣應期坐使鯨  
鯢化為菹醢庸非精爽達于明神幽贊元勳昭蘇宿憤  
詔旌大節追冊上公寵以飾終禮惟加等某肅將密命

敷布皇猷慰拊瘼傷勞勉忠義拜乎天闕躬承德音命  
以觴牢備茲俎豆發於聖旨斯謂馨香公其降靈歆我  
明德尚饗

為留守賈尚書祭顏太師文 前人

維年月日某官某謹以清酌少牢之奠敢昭告于故太  
師贈司徒顏公之靈天寶季年幽都首亂生人流血中  
夏擾攘公守在一麾援絕十里居鯨之腹而刳其腸履  
虎之尾而拊其背率先大義以集中興歷事四君匪躬

一致全德邁俗正詞興邦克朝孔門兩造其極昇沉間  
覺東南不開帝謂師臣予厭征伐往以至化勝其兇殘  
于時公請老未獲蓋三年矣曾不俟駕豈公安車惟物  
之生善惡有性豺狼犬馬罔克相遷天能生之而不能  
化况彼元惡逆成膏肓針藥靡攻仁智何及奉命所在  
顧身如遺奈何明神孤我積善帝念忠烈國思典刑棟  
折將壓哲萎安放嗚呼哀哉昔者仰揖重名遐跂明德  
邈焉當代如望古今敬令疑高風感歎大節卓爾不朽



凜然如生巨猾殲夷幽魂昭奉靈輿歸路千里同悲永  
惟忠勲宜在祀典况臨緋紉敢廢蘋蘩嗚呼哀哉尚饗

為留守崔尚書祭表給事文 前人

維年月日某官某謹遣某官某以清酌少牢之奠敬祭  
于故給事中汝南公表三丈之靈昔我烈祖洎公先哲  
同力王室惟歡世家俾為墳麓且秩昭穆殆茲小子恭  
事丈人於惟丈人義切師友間氣全德稟之自然資元  
精之餘和邁生人之弘致遵周孔之軌躅行天下之直

道是用萃厥孝友發于文儒播乎循良時以塞謬出納  
帝命時惟掖垣政之或虧期不奉詔義之所激挺不顧  
身寤天聽於未聞及大號於已出吐羣公之所茹垂聖  
朝之直聲雖霖雨舟楫之用未躋于位而股肱耳目之  
任獨冠于時其生也公相讓德有臧文竊位之歎其歿  
也縉紳相弔有國僑將壓之懼惟昔遘燬萬心禱天天  
之愛人宜有所錫如何大運不即一作即遠我謀君子於是  
乎始疑明神而信定命輶車何所從先公居前有伊川

萬古流美其離次是懼臨穴莫從百身靡追一慟何及  
哀填意竭式寄蘋蘩嗚呼哀哉尚饗

為留守鄭侍郎祭鳳翔張相公文

前人

維年月日某遣某官某敢以玃牢之奠昭告于故相國  
贈太子太傅張公之靈嗚呼天之不可問也信矣災不  
避聖禍不擇賢在昔禹湯寔逢水旱今我堯舜厥有羿  
浞公如季路終以結纓盖君以避狄為仁臣以死難為

義不朽是貴全身曷榮嗚呼哀哉公性本生知學成全  
德跡踐教極心遊聖源始以耕雍終以咎稷取其餘事  
猶為龔黃用其末學亦謂方名若昊天之將喪斯民也  
則不當生德於公錫公於主既執其柄載行其道方俾  
我后格于皇天一夫不獲引以為咎而奪我靈府移於  
四支使魚爛自中原燎斯及主辱臣死誠不在公守位  
以終是為不沒明明元首始喪股肱凡百縉紳靡所冠  
冕伏念平昔交如弟兄同則墳篋相和異則韋絰迭佩

公頃自郎署往蒞東西秦楚相望音容不隔逮於晚歲  
又忝倅戎時迫登賢事止中道恩加前好名在舊賓今  
寵贈表榮詔葬旌烈官司是繫弔哭無從泣遣行人哀  
將菲薄孰云觴豆可盡平生嗚呼哀哉尚饗

為留守鄭侍郎祭李相公文 前 人

維年月日某官某謹遣某官某以清酌少牢之奠敢昭  
告于故相國尚書左僕射贈司空李公之靈惟靈天鍾  
地資生備五福昔者玄宗之代天下治平時重文儒禮

侔齒爵公始之鴻漸蔚為羽儀從容主文在帝左右既  
而皇家中否寶厯嗣興明明肅宗康難致理天地交泰  
聖賢相逢其所以濟川救旱和羹作醴稽視說命事符  
古文嗚呼才之用捨繫乎時道之行否存乎命珪組遺  
累江湖為家興協騷人我無其怨詠歌堯舜二紀忘年  
皇唐建中天子縉服維新庶績先禮舊臣授公成均以  
舉政本爰降徵命典司春官先是昆夷不庭歲為邊患  
亦既款塞願歸聖理帝曰春秋之義許之不一而足和

之五利斯在歷選列辟繫公簡心資王商之盛容將魏

絳之故事公感恩自奮暮齒

一作歲

方剛寵茲肩輿遵彼

絕域俄屬賊臣間豐罕畢在邦公昭格外夷俾為內援

嗚呼風沙勤瘁共薄頽齡王事畢矣我勞盡矣僅履吾

土亦終天命原夫始終寔盡善美湛恩緝禮論者宜之

至若史氏立言訓辭作誥秘在天府式為國經世有五

姓冠于百族有如姬姜取貴春秋擢秀天人惟公而已

有司備物返葬故丘觀者哀榮况承眷舊敢憑奠酌以

降明靈尚饗

祭福建鄭大夫文

前人

維年月日故吏某官某敢薦薄奠于故福建都團練觀  
察處置使福州刺史兼御史大夫鄭公之靈伏惟自天  
降靈為國之楨溥博閎達昭融粹精中和植本體禮歌  
榮應物以順逢時中清爰自筮仕之初及乎懸車之期  
惟天命是信惟聖言是思德合明神心為元龜動享黃  
裳之吉不稽洪範之疑論交審其始其結也不解用才



要其終其報也不欺仲山吐茹吉甫文武四國羽儀烝  
又父母憶昔高門照灼寰宇榮冠一時名列三虎我公  
南遷返旄東土仲也壯齡相從萬古季兮不幸昔陷于  
虜忽如嚴霜殞落繁柯倏爾成空天乎謂何某嘗以斯  
文忝膺辟史載筆如昨攀車何洎我有甘棠東城桃李  
悠悠清溪永代流美願託遺孤以奉恩紀黍稷非馨微  
誠所至嗚呼哀哉尚饗

祭楊郎中文

許孟容

維貞元十九年歲次癸未四月壬午朔二十二日癸卯

給事中許孟容吏部郎中李備

一作備

司封郎中韋成季

屯田員外郎穆員右補闕張惟素京兆府司錄薛丹等

潔牢醴庶羞以祭于兵部郎中楊君之靈大鈞生陰

隲者誰殲惡輔善胡顛倒之擬聖草玄子雲位卑中庸

殆庶回天不時吾友懋功粹靈天資文為國華行作人

師不至公相不登期頤嗚呼昊穹報施云欺交以利合

滔滔其衆直義許心惟君伯仲金石非固韋弦迭用柯

葉四時古之所共昔也三虎季奪天縱今也二龍叔間  
丘慟甲乙論辨聲聞我求桂枝崑玉邵氏無儔典校蓬  
山佐賢戎州渚宮峴首人賴嘉猷瑤墀記言方冊潤色  
列宿有耀彌綸皇極鼎臣專征在浚之郊輟我網轄俾  
參鞬索元侯歸全符節自朝戎有伏莽變生中宵呀呀  
獲噬鄜里流血正直之形豺狼不噬歸來閑燕望在清  
切琴史方娛簪裳靡屑抒懷擣藻致遠詞絕文昌貴郎  
莫最司戎惟是利器簡于宸衷求賢得人天下至公鴻

鷓不翦麒麟在馭九霄咫尺萬里跬步躡景搏風過之  
中路天若可問余徵其故先哲嗣仁藩翰蓋臣南國之  
紀洞庭之濱叫呼在聆淚血在中槌裂酸楚悽心動神  
賓階寂寥總帳參差露濕芳樹風悽曲池劍光塵昏履  
跡苔滋幽琴憂而無聲玉笋盈而不持惟古今之俱盡  
悟彭殤之一期留景飡霞兮昔人謂誰隙駒舟壑兮達  
者不悲齊脩短於一致必後先之匪移平生理言造次  
在茲本懸解之達觀吁坦懷而暫夷哀挽徐出泉臺永

閱觴豆匪馨塗芻有位蒼山霧幕表滄波駛紛帷轄之  
依遲杳精魂之髣髴匍匐友好伶俜孀稚玉樹春凋文  
星晝墜士歎梁木朝嗟國瑞三月徒來百身無異緘悅  
痛於曾抱孰哀詞之可既尚饗

文苑英華卷九百八十五

欽定四庫全書

文苑英華卷九百八十六

宋 李昉等 編

交舊九

祭韋太尉文三首

祭張中丞文二首

祭王員外文一首

祭崔中丞文一首

祭何大夫文一首

祭顓和尚文一首

祭李處士文一首

祭樊司空文一首

祭呂郎中文一首

祭李中明文一首

為劉尚書祭韋太尉文

符載

維年月日某官某祭于某官之靈乾坤瑞氣翁鬱淳精  
誕生碩臣為才為英其體顛昂其神清明大包九德全  
貫五行聞望昭宣勳業崢嶸靜專動直淵默雷聲甲子  
之歲宗社震驚塵飛四野人弄豆兵公一作昔在隴州保  
捍孤城師徒顛顛凶孽縱橫一發沉機萬夫掃平天維  
地軸為之不傾天子報功夫何超越全蜀千里虎旗龍  
節堅完卒乘延納賢傑武事雄後文華昭晰西戎天矯

南詔夔絕德惠震威投心象闕激揚風教提携義烈二  
十年間施江澄澈爰有獷人驃國彌臣化所未洽古之  
不馴飲我大誠沛然來賓遂使皇澤播其無垠奉聖功  
成樂府聲新一時事業萬古紛綸實異昊穹福善與人  
何豫章之磅礴奄摧落乎青春嗚呼曩者危疑之際邪  
臣交構獨秉精誠飛章上奏忠同折檻詞近及雷昏霧  
忽清太陽乃晝淒涼陳跡悅壽中壽志未展於生前寵  
徒光於身後嗚呼某以薄劣獲事旌旃猥承國士之顧



謬居羣彥之先徬徨授署昧惜機權顧無能於布政懼  
取譏於大賢蕭條岐路眇默風煙諒祖真之無路瞻壽  
堂而潛然

為賈常侍祭韋太尉文

至道之世君臣聖明必有賢才為之挺生昭昭我公得  
一居貞窺神靈之壺奧涵天地之淳精胸襟洞達方畧  
縱橫文房啓而風雅斯在武庫開而禍亂乃平甲子之  
歲送泚變節河海沸騰宗社兀隍孤軍隴上勢窮援絕

激臨危之肝肺成曠世之勳烈帝有寵命擁旄蜀川威  
聲烜赫德禮昭宣家有美政人無兀賢熙熙穆穆二十  
餘年機謀內發英明獨照頓挫西戎經營南詔通驃國  
之幽阻導彌臣之竄窳咸屈膝於君王信萬古之榮耀  
方期驅兵率衆謁帝庭承汪濊之殊澤陳訐謨之大  
經如何尊重溝茲殞靈地偃喬岳天沉輔星昨者疾瘳  
之日咸望再起頻造屏內候公動止憂國慷慨請立太  
子事苟未行歿而後已今上嗣位人神交喜哀傷大賢

不見如此某謬以菲薄監臨此軍參蕭曹之議論覩伊  
霍之功勲淒涼門館顧慕風雲非百身之可贖寄一慟  
於斯文

為西川幕府祭韋太尉文

維年月日祭於某官之靈聖歷應數今古同風五百年  
間運屬我公長河噴射太華穹崇鬱起生人之表獨棲  
顛氣之中往者鯨鯢蕩海波濤洶洶京洛風塵人神震  
恐公遂屹立天授智勇斬刈師徒扶持汧隴逆黨顛顛

心推計擁繇是安危繫之輕重天子報功禮數乃殊既  
渥龍節亦執金吾國之西南寔曰成都夷夏混合山川  
盤紆苟非哲人莫啟令圖咨我賢達付之方隅公乃歷  
坤維以厚德注羣生以和氣應變參乎杳冥布政歸乎  
簡易剗風俗之姦竊平人心之險陂肅貔貅以雲屯禮  
英髦而磨至蠲萬痾於藥草新百貸於鄠肆綢繆賓客  
之歡肅穆鬼神之祀補前人之漏畧極當時之能事道  
尊而曠俗承風聲烜而殊鄰慕義信信犬戎背約報仇

疆場蔓毒大邦寇讐公動機權控扼咽喉闢其隄落係  
其魁首岷和罕雲大渡橫流伏不敢動垂二十秋伊昔  
南蠻嚮化虔奉朝旨將率非良撫綏失禮興兵戰伐深  
入邊鄙十萬之師蕩為燼鬼公以誠往彼由感起拜新  
詔於皇都歸舊封於越舊提携椎髻之類遙列青衿之  
齒驛國之與彌臣伏聯蹤而疊軌臣製樂以奉聖裁文  
以叙美考一德之輝光諒有唐而已矣方期五福之壽  
享九命之尊致雍熙於宇內相玉帛於天門何至業之

埋鬱逢逝水之迅奔竭涸滄海摧頽崑崙精靈一去微  
烈空存嗚呼哀哉錦城秋暮北郊長路寂寞山川蕭疎  
草樹雖蘋藻之屢薦終轎車而不駐慟軍府之悲涼增  
煙霞之思暮某等俱以孱鈍獲事旌旄庇蓮府之光彩  
無汗馬之勲勞戴恩愧厚顧位慙高問沉痛之何有與  
三江之滔滔

為劉尚書祭張中丞文二首 前 人

維年月日祭于某官之靈惟靈和粹在躬行方而通瀟

洒罵塵之外翱翔禮樂之中與物大聖推之至公落落  
賢人之慶恢恢長者之風學有餘力備功衆藝環璧文  
章龍蛇草隸江湖之地東西無際獨負高名聞乎早歲  
赫赫太師光鎮此川大啟幕府盡心招延運籌帷幄之  
內折衝樽俎之前鬱然時論謂蜀得賢某也不才接武  
隨肩緜茂三益周旋十年或朝遊古寺或夜接華筵歡  
呼醜筍嘯傲風煙神理無狀忽鍾沉疾顧侶無悰懷仁  
若失陰深府舍寥落煙日雖道義不間於同心而語笑

每乖乎促席何士林之凋瘵碎金相與玉質某以懦劣  
謬司戎律方屬理兵未遑造室眷言襟契何啻膠漆一  
面有乖百齡俄戢舊鄉迢遞素帷蕭瑟望精爽以申哀  
誠不知涕洟之所出

二

惟靈總四科之要推六藝之先襟懷灑散文翰聯翩寄  
情琴酒長嘯風煙有名當世三十餘年誠謂羽翼中朝  
潤色王度翔鸞彩鳳翹翼雲路荏苒江海蹉跎晚暮道



乃光華疾成沉痼崇巖絕

舟集作

壑松摧桂蠹哀茲下泉

永寐不寤某頃同舍周旋後塵肺腸見許筆硯相親顧  
以孱虛每慕仁人實異鄙志於茲大伸奈何昭時奄落  
窮塵永懷道義臨風酸辛畫翼柳車白日青春鄉闕樹  
老岷蜀塋新戎事見羈執紼無因具罇罍以寫意聊寄  
恨於江濱

為劉尚書祭王員外文

前人

維年月日祭於某官之靈惟靈行業端簡襟期高朗類

彼雲霄萬夫是仰根蟠一德冥入羣象和自中來道非  
外獎風儀峻峙神氣森爽清濟橫流蓮峰直上爛爛文  
章早歲擅場鏘金叩玉折桂穿楊昔在太師作鎮坤方  
大啟幕府聿求賢良君赴招筵價重珪璋賓主之際赫  
然有光余復繼來廁接周行契侔金石韻擬笙簧並几  
聯曹擁闥環廊紛紜笑詭爛漫壺觴昨者象緯成災禍  
丁故使門庭倉卒軍旅沸涓猥蒙遺令俾司留事顧此  
孱虛實憂殞墜東川無狀橫相猜忌破表焚牋封山掠

騎因得討罪誅其不義屢犯鋒鏑幾經憂畏天子明察  
龍旌旋至何事諛才忽膺重寄告語未接潰瘍已熾晷  
刻小睽音容永閔如何昊蒼負此沉意危迫是同歡榮  
乃異嗚呼哀哉嘗察分切親懿情偏念家道之霜藐若  
肺腸之焦然位不過郎署壽纔及中年彼禍淫與福善  
吾將仰首而呼天一罇酌莫百慮纏綿惟撫孤之感躅  
庶幾誠之在一作焉

為杜相公祭崔中丞文

前人

嗚呼子有四教文行忠信惟公佩服終身不磷惠慈敦厚溫恭淑慎趨善如流惟賢是進公方可與利用無朕駮驥絕塵青萍淬刃累參戎府九牧大郡教化諏謀作程垂訓不躋高位丁此巨疊茫茫上天殲我賢雋嗚呼佑自弱齡實奉周旋綢繆出處四十餘年昔佐此府周行接聯佑忝末介公總中權朝整金鑣夕同綺筵揮動醜箏沉吟風煙對博千場春日秋天氣振耳熱勝負爭前今也冥冥音容貌然沉思永痛涕泣纏綿嗚呼世且

多故權寔茲地苟安其宅豈靈之意悠悠羸疾浩浩官  
吏無因執紼遠送幽隧天寒景淑雲愁鴈思傾一卮以  
寫哀誠痛百年之永異

祭何大夫文

前人

巖巖泰山羣嶽攸宗公有盛德與之比崇高朗沉深神  
超氣融禮樂方外粹和積中顛顛昂昂大人之容天高  
起鶴泉深見龍早張雄詞叩玉鏗鏘文場一戰陷敵摧  
鋒結綬王畿部局生風拾遺丹階危言匪躬公嘗從事

浙西盛府咨籌畫畧輝光賓主皇帝順狩褒梁重阻納  
貢匍匐達行在所帝曰首至西方惟汝建社擁旄于鄂  
之渚自公之來法舉令行鋤姦剪暴振獨蘇惇疆理封  
域繕完甲兵十五餘年夏水潦清德宇弘曠威容光明  
日翼休時調鼎和羹嗟此梁棟奈何頽傾一作位竟不  
來負我蒼生嗚呼載有蓬戶廬山之曲接連人郡沿洄  
往復早獲請謁許布心腹掩過與能情優禮縟想公振  
揚清風無鄰律呂翰墨龜龍縉紳遺我細微合我嘉姻

永言感慟破骨傷神嗚呼哀哉去歲春暮旌旗滿路眄  
睐風煙留連草樹前日東亭天光曉晴金罇玉管芳樹  
流鶯誰謂累夕幽明遽隔瞬目交臂遂成古昔心敬無  
飾詞哀必激寫慟絕於江干疑精靈之可覲

為楊廷評祭何大夫文

前人

伏惟尊靈涵清明之氣秉中庸之德事業存乎教化忠  
厚形於家國文章根風雅之奧議論探玄聖之域虎視  
犀額山立玉色惟公昔年聲譽赫然拾遺補闕丹陛之

前天子思理垂意藩外聿來沔鄂十五餘載浩浩茲邑  
民繁境大通至信於豚魚被深仁於幼艾秋霜可畏春  
日可愛卷風波於夏水失險阻於西塞嗚呼地有四海  
候一作俟公而清天有三階望公而平昊穹謂何殲我賢  
明小人君子號呼震驚嗚呼賓王之道人倫之義情禮  
所加殺身有地如朗小子孱愚下位無絕俗之姿寡卓  
然之異猥辱提引叨居賢次顧侶之榮撫心多愧頃將  
重命驅車遠使不憚山川敢告顛顛昔我往矣龍節煌



煌今我来思丹旒悠揚慟哭江干若摧肺腸儻神理之  
昭鑒殊辛酸之未央

為江西李常侍祭顓和尚文 前人

大方浩浩天高地厚彼上人者空門稱首塵埃三界揮  
斥萬有如淨蓮花出泥離垢早歲蜀中師事全公一言

悟解了得真空靈覺內虛妄境外融寶山見月

一作寶山見

性海無風某謬以菲薄投心依止周旋瞻仰年踰一紀  
東洛之濱湘江之涘晨朝後夜談玄析理破壞結縛我

則用喜甘露洗心簫韶洞耳一昨猥受朝寄聿來此方  
撫俗未幾懷仁不忘師雖無心應物則深尺素紆屈千  
里相尋纏綿舊故啓廸塵襟窮樊邑之風物暢平生之  
登臨嗚呼風火扇災遽成沉疾睽累旬之晤語謝百靈  
疑作之形質雖真性之湛然愴尊容之已失荒郊野塔  
齡秋晨曉日幡蓋飄蕩香花蕭瑟寄慘怛於斯文諒悲懷  
之不一

祭處士李君文

前人

良友三人來自蜀川身棲廬嶽氣屬雲天至寶多脆靈  
芝不堅君與王生早落窮泉當時食貧空禮從權殞宮  
蕭索二十餘年在風塵中觸故牽纏每懷曩昔深衷惻  
然頃亦有意祇承付託訪君姻族獲歸京洛賢舅緇褐  
外弟罷弱實恐歲時遂移舟壑神本尚簡禮貴適時即  
其故地而窳窳之衛玠短命伯道無兒千秋拱樹我心  
傷悲嗚呼吾李處士已而已而

祭樊司空文

前人

天有神氣地有山川交感網緼實生大賢聰明惠和忠  
厚塞淵體剛法健動直靜專在昔安卑屈宰堯山聿來  
射策懼疑登紫垣異日從容危冠上前以手畫地慷慨  
論邊道合時來舜日堯年纏綿三接奮發九遷帝念和  
戎公駕軺軒詞危氣激張威懾蕃擁旌襄漢建旆荆蠻  
卒乘完勁勲庸昭宣征南當陽芳若蘭荃我有令問與  
之周旋嗚呼仁人在上安危所屬世且多難奪公何速  
溘然多露壞乎梁木望缺三台壽虧五福大誠至信漸

人被俗擁杵輟春鄉號里哭嗚呼載本諸生器識孱愚  
猥辱拂拭化珉為瑜昔歲渚宮濯涸濡沾前年南擁顧  
重禮殊將致賓僚將貢國都感念厚意使人捐軀漢水  
之陽峴山之隅千乘晞晞旦夕陪趨秋景沉寥春華芳  
敷瀾漫醜箏淒箏筓拜首節旄將去踟躕吟嘯叙什  
丁寧匡廬星霜未周幽顯異途神歸蒼昊魄散黃墟明  
明知音今也其孤仰天涕下被臆交襦嗚呼舊山之下  
石田疎惡智昧經營食無藜藿歲時淹久情禮漏畧瞻

望壽堂脾酸肺一作削驅策輿隸匍匐宛洛清酒隻雞

中疑作哀獻恪涼風白露惟帳蕭索門戟朝開井桐夜

落生芻一束意不為薄寫慟絕於精靈莫斯文之可託

祭呂郎中文

集作祭呂  
衡州溫文

柳宗元

維元和六年歲次辛卯九月癸巳朔文粹作八月  
癸亥朔某日友

人守永州司馬員外置同正員柳宗元謹遣書史同曹

家人襄兒以集作清酌庶羞之奠敬祭于呂八兄化光

之靈嗚呼天乎君子何厲天實仇之生人何罪天實讐

之聰明正直行為君子天則必速其死道德仁義志存

生人天則必夭其身吾固知蒼蒼之無知

集作信

冥冥

文料

作漢漢永  
本作莫莫

之無神令於化光之歿怨

文料作悲

逾深而壽愈

集作

甚故復呼天以云云天平痛哉堯舜之道至大以

簡仲尼之文至幽以默千載紛爭或失或得綽

二本

乎

吾兄獨取其真

二本  
作直

貫乎化始與道咸極推而下之法

度不忒旁而肆之中允塞道大藝備斯為全德而官

止刺一州年不逾肆

文料  
作五

十佐王之志沒而不立豈非

脩

文粹作循

正直以召災好仁義以速咎

文粹作天

者耶宗元少

二本

雖好學晚未聞道

文粹作未聞其道

洎乎獲友君

一作吾

子

乃知識

集作通

於中庸削去邪雜顯彰

二本

直正而為道

不謬吾兄

二本作兄實

使然嗚呼積乎中不必施於外裕乎

古不必諧於今二事相兼

二本

從古至少至於化光最

為太甚理行第一尚非所長文章過人畧而不有夙志

所著

文粹作蓄

巍然可知貪愚皆貴險狠皆老則化光之夫

厄反不榮歟所慟者志不得行功不得施蚩蚩之民不



被化光之德庸庸之俗不知化光之心此言一出內若

焚裂海內甚廣知者

集作音

幾人自友朋凋喪志業殆絕

惟望化光伸其宏畧震耀昌大與行於時德使斯人

作使斯人徒

知我所立今復往矣吾道窮

二本

矣雖其大

二本

作存者志亦死矣臨江大哭萬事已矣窮天之英

文粹作學

貫

古之識一朝去矣

二本

又

一本

復何適嗚呼化光化光

今

集有後字

何為乎止乎行乎昧乎明乎豈蕩而為太空與

化無窮乎將結而為光耀以助照臨乎將

二本

為雨為

露以澤下土乎將為雷為霆以泄怨怒乎豈為鳳為麟

為景星為慶

二本  
作卿

雲以寓其神乎將為金為錫為珪為

璧以棲其魄乎豈復為賢人以績其志乎將奮為明神  
以遂其義乎不然是昭昭者其得已乎其不得已乎抑  
有知乎其無知乎彼且有知其可使吾知之乎幽明茫  
然一慟腸絕嗚呼化光庶或

文粹  
作幾

聽之尚饗

### 祭李中明文

前人

維年月日柳某謹以清酌庶羞之奠致祭于亡友中明

之靈夫子之道邈以恒兮夫子之志勵以兢兮求中以

謙

二字集本作憊

未若履冰兮敦仁以孝實烝烝兮雖一作毀

無虧禮莫徵兮

集作惟毀死虧禮其他莫懲兮

秉端守一信厥朋集作明

兮月踰歲長行若登兮外溫其顏內類直繩兮謾言來

加不遽陵兮舉世羣非自視弘兮庶優游於道大賚是

承兮掩寃舒抑與類升兮胡茫茫而

集作其

不信卒以禍

仍兮豈韜忠哀

集又注作衷又作履

信鬼所憎兮將教言吾欺終


不可徵兮吾方冀子于暮翼有興兮今而棄余志若崩

兮若將援而止喪厥肱兮怛而集作其殞心交背膺兮水

之綿綿山萬層兮又淫以雨雪紆委礪礪兮鷓鴣夜號

集作帝羣暝凝兮菟思柳州本以行中道凌兢兮魑魘搗

呵曷可憑兮聊致吾慎集作憤斯言孰稱兮



文苑英華卷九百八十六

欽定四庫全書

集部

文苑英華卷九百八十九

七至九

詳校官庶吉士臣龍廷槐

助教臣常循覆勘

總校官進士臣朱鈺

校對官助教臣蔡鎮

謄錄監生臣胡曉春

欽定四庫全書

文苑英華卷九百八十七

宋 李昉等 編

交舊十

祭崔使君簡文一首

祭崔使君神柩歸上都文一首

祭崔使君敏文一首

為崔侍御祭穆員外文一首

祭李柳州文一首

祭太常裴少卿文一首

祭薛中丞文一首

祭虞部張員外文一首

祭亡友柳子厚文一首

祭張給事徹文一首

祭竇司業文一首

祭馬僕射惣文一首

祭柳州柳員外文一首

祭

集有妙夫二字

崔使君簡文

柳宗元

某年月日某謹以清酌庶羞之奠祭于永州刺史博陵

崔君

集作公

之靈天之生人或哲或愚君取其英爰輝

集作

耀于初譽動京師

集作邑

施於方隅密勿書奏元侯是俞



蜀寇內侮禍連羌髻君出顯畫披攘其徒南平劔門西

獲戎俘超受刑曹留守

集作  
摠

南都移刺連部下民其蘇

道不可常病惑中途悍石是餌元精以渝雷謗爰興按

驗增誣始雖進律終以論辜溟海浩浩而君是踰崇

集作

嵩

山茫茫而君是居厥弟抗憤叫于天

集作  
康

衢天子憫

焉評以文書御史既斥連帥是除期復中壤遽淪別區

喪還大浸又溺二孤痛毒存仍振古所無何適

讀作  
調

于

天降此剪屠柩不及歸寓葬荒墟將葺將就誓還里閭

嗚呼君之子姓惟自我出母儀既虧父訓又失煢煢相

視撫悼增恤咸冀其才以大家室惟昔與今

集作君

年殊

志匹書詒夕討期正文律實契師友豈伊親暱

集作昵

誰

謂斯人變易成疾良志莫踐乖離永訣

集作訖

嗚呼永山

之西湘水之東殞紉以出斧屋爰封神非久留息駕于

中書石為誌世德斯崇拜首以酌出涕無窮

集作手酌以酌涕出

窮焉

祭崔使君神柩歸上都文

前人

嘻乎崔公之柩嘻乎崔公楚之南其土不可以室或坊

而頽或墉而萃陰流

一作沉

泄漏瀝沒渝溢碩鼠大蟻傍

穿側出虧踈脆薄久乃自窒不如君之鄉式堅且密嘻

乎崔公楚之南其鬼不可與友蹠戾佻險睽眦欺苟胜

賤暗忽輕罵

一作罵

妄走不思已類好事羣醜不如君之

鄉式和且偶日月甚良子姓甚勤具是舟舉寧君之神

去爾夷方返爾故隣奕奕其歸宜樂且忻君死而還我

生而留永矣殊世曷從之遊酌觴于座與涕俱流

祭崔使君敏文

前人

夫產崑崙者難為玉植鄧林者難為木公以令望顯于  
華族藝邃六書學該七錄耽此黃老恬於寵辱入補黑  
衣出參向服紀綱淮海政令維肅宰制岳瀕周於仁育  
諸闡典議直清攸屬久次推能二州繼牧至于是邦率  
由舊俗和易勿亟優游自足既有小集作少吏亦勤集作勤于  
庶獄妖誣殄除淫祠剪覆出令三歲人無怨讟進律未  
行歸神何速某咸以罪戾謫茲炎方公垂惠和枯槁以

光鳴鸞適野泛鷓沿湘廣筵命樂華燭飛觴高歌屢舞  
終以無荒紛慮斯屏憂懷暫忘良時不再斯樂難常今  
其奈何顧慕增集作感傷嗚呼哀哉室有迭去川無息流  
追懷曩晨恍若夢遊奠撤集作微中寢魂遷葉集作乘舟邦  
人永思匍匐隱憂况我懷德心焉若抽潔誠可鑒蘋藻  
非羞

為崔侍御祭穆員外文

韓愈

維年月日故人博陵崔翹謹以清酌之奠祭于亡友穆

六端公之靈於乎建中之初予居於嵩携扶北奔

集注  
作歸

避盜來攻晨及洛師相遇一時顧我無

集作  
如

故睠然顧

之子有令聞我來自山之子峻明我鈍而頑道實

集作  
既

云異誰從知我我思其厚不知其可

集注作不  
可而可

於後八

年君從杜侯我時在洛亦應其招留守無事多君子察

罔有疑忌惟其嬉遊草生之春鳥鳴之朝我戀在手君

揚其鑣君居其

集注作  
復我

室我既來即或以咏

集作  
嘯

歌或

以偃側誨余以義我復

集注作  
復我

以誠終日以

蜀本  
作與

語無

非德聲主人信讒有惑其下殺人無罪誣以成過入救

不從反以為禍赫赫有聞王命三司察我于獄相從係

縲直

一作曲

生何

蜀本

作曲死何

蜀本

悲上懷王人

蜀本

人內閔

杭本

作開其私進退之難君

集作居

處之宜既釋于囚

我來徐州道之悠悠思君為憂我如京師君居父喪哭

泣而拜言辭不通我歸自西君反吉服晤言無他往復

其昔不日而違使

集作重

又作禱我心惻自後聞君母喪是丁

痛毒之懷六年以并

集注

作經孰云孝子而殞厥靈今我之

至入門失

集作哭

聲酒肉在前君胡不滄升君之牀

集作堂

不與我言嗚呼死矣何日來還

祭李柳州文

前人

維元和元年歲次景戌二月乙未朔二十四日戊午將  
仕郎守江陵府法曹參軍韓愈謹以清酌庶羞之奠敬

祭于故柳州李使君員外二

集作三

兄之靈古語有之白

頭如新傾蓋若舊顧意氣之何如何

集作曷

日時之足究

當貞元之癸未

一作酉非

惕皇威而左授伏荒炎之下邑嗟



名顏而位仆歷貴部而西邁邇清光於集註而暫覲言莫

集作

交而情無由既不賈而奚售哀窮遐

集作

之無圖

若

集作

弩

集註

自副辱問訊之綢繆常

集作飽饑

而愈疾接雄詞於章句窺逸跡於篆籀苞黃甘而致貽

一作

獲筆紙之雙貿投義魚之短韻愧韜瑕而舉秀俟

新命於衡陽費薪芻於館侯空大亭以見處鰓水木之

幽茂逞英心於縱博沃煩腸於集註以清酌航北湖之空

明覲鱗介之驚透宴州樓之豁達衆管啾集作而非而並奏

得恩惠於新知脫窻

集作窮

愁於往陋輟行謀於俄頃見

秋月之三穀逮天書之下降猶低迴以宿留念睽離之

在期謂此會之難又援

集作授

縞紵以託心示茲誠之不

謬儻後日之北遷約窮歡於一晝雖椽奉之酸寒要拔

貧而為富何人生之難信指

集作捐

斯言而莫就始訝信

而一作於

暫踈遂承

集作成

凶於不救見銘旌之低昂尚遲

疑於別袖憶交酬而迭舞奠單杯而哭柩美夫君之為

政不撓

一作倏

志於讒搆遭唇舌之紛羅獨凌晨而孤雛

彼儉人之浮言雖百年一作其何詬洞往古而高觀固  
邪正之相寇幸竊覩其始終敢不明白而蔽覆神乎來  
哉辭以為侑尚饗

祭太常裴少卿文

前人

維元和九一作元非年給事中李逢吉給事中孟簡吏部侍

郎張惟素吏部侍郎張賈比部郎中史館修撰韓愈等  
謹以庶羞清酌之奠致祭于太常裴二十一兄之靈朝  
廷之重莫過乎禮雖經策具存而精通蓋寡自郊丘故

事宗廟時宜大君之所旁求丞相之所卒問羣儒拱手

宗祝醉心兄皆指陳根源斟酌通變罔不允符天旨克

協神休至于公卿冠婚士庶喪祭疑皆響答問必實歸

從我者定集作足為軌儀異我者無逃指笑動為時法言

比集作必古經獨立一朝高示千古而又驅馳朋執僂俛

宗親擔石之儲常空於私室方丈之食每盛于賓筵贈

必固辭求無不應孰云具美而不永年愈等早接遊從

實欽道義致誠薄奠以訣終天嗚呼哀哉尚饗

祭薛中丞文

同李逢吉  
孟簡等

前人

維元和九

一作元非

年歲次甲午閏八月乙巳朔十五日巳

未某官某乙等謹以清酌庶羞之奠祭于亡友故御史  
中丞贈刑部侍郎薛公之靈公之懿德茂行可以勵俗  
清文敏識足以發身宗族稱其孝慈友朋歸其信義累  
升科第亟踐班行左掖南臺共傳故事詩人墨客爭諷  
新篇羽儀朝廷輝映中外長途方騁大限俄窮聖上軫  
不憖之悲具察興云亡之歎况某等忘言斯久知我俱

深青春之遊白首相失來陳薄奠詎盡哀誠嗚呼哀哉  
尚饗

祭虞部張員外季友文

前人

維元和十年月日中書舍人王涯考功郎中知制誥韓  
愈禮部侍郎崔羣京兆尹許季同考功員外郎庾承宣  
河中節度判官殿中侍御史邢冊等謹以清酌庶羞之  
奠敬祭于亡友張十三員外之靈嗚呼往在貞元俱從  
賓薦司我明試時維邦彥各以文售幸皆少年羣遊旅

宿其歡甚焉出言無尤有獲同喜他年諸人莫有能比  
倏忽逮今二十餘歲存皆衰白半亦辭世外纏公事內  
迫家私中宵興歎無復昔時如何今日

集註作於今

又失夫

子懿德柔聲永絕心耳廬親之墓終喪乃歸佯

集作陽

瘖

避職妻子不知分司憲臺風紀由振遂遷司虞以播華  
問不能老壽孰究其因託嗣於宗天維不仁酒食備設  
靈其降止論德叙情以視諸誅哀哉尚饗

祭亡友柳子厚文

前人

維元和十五年歲次庚子五月壬寅朔五日景午韓愈

謹以清酌庶羞之奠敬祭于亡友柳君

集本唐文粹無君字

子厚

之靈嗟嗟子厚而至然耶自古莫不然我又何嗟人之

生世如夢一覺其間利害竟亦何校當其夢時有樂有

悲及其既覺豈足追惟凡物之生不願為

杭本作謂

材犧樽

青黃乃木之災子之中棄天脫帛羈玉佩瓊琚大放厥

詞富貴無能磨滅誰紀子之自著表表愈偉不善為斷

血指汗顏巧匠旁觀縮手袖間子之文章而不用世乃



令吾徒掌帝之制子之視人自以無前一斥不復羣飛

刺天嗟嗟子厚今有令亡

一作令也則亡

臨絕之音一何琅琅

徧告諸友而

二本作以

寄厥子不鄙謂余亦託以死凡今之

交觀勢厚薄余豈可保能承子託非我知子子實命我

猶有鬼神寧

集註作子文粹作弗

敢遺墮念子永歸無復來期設

祭棺前矢心以辭嗚呼哀哉尚饗

### 祭張給事徹文

前人

維年月日兵部侍郎韓愈謹以清酌之奠祭于故殿中

侍御史贈給事中張君之靈惟君之先以儒名家逮君

皇考再振厥華鄉舉

集作貢

進秀有司第之從事元戎謹

職以治遂拜郎官以職王憲不長其年飛不盡翰乃生

給事松貞玉剛幹父之業纂文有光屢辟侯府亦佐梁

師前人是似羣吏嗟咨御史闕人奪之於朝大厦之構

斧斤未操府遷幽都頑悖未孚繫君之賴乃奏乞留乃

遷殿中朱衣象服

集作板是

惟義之趨宣利之踐虺豺發豐

闔府屠割

集作剝

償其恨祀君獨高脫露刃成林弓矢攘

攘千萬為徒噪謹為狂君獨叱之上不負汝為此不祥

將死無所雖愚無知慚屈變色秉

集作君

義不辱殺身就

德天子嘉之贈官近侍歸於一死萬古是記我之從女

為君之配君於其家行實高世無所於

集作掩

葬與

集註作與

魂東歸誅以贈之莫知我哀嗚呼哀哉尚饗

### 祭竇司業年文

前人

維年月日兵部侍郎韓愈謹以清酌庶羞之奠祭于故  
國子司業竇君二兄之靈惟君文行夙成有聲江東魁

然厚重長者之風一舉於鄉遂收厥功屢佐大邦

表本作侯

以調兵戎詔曰予虞汝為郎中乃令洛陽歲且四終維

刑之慎掌正隸僅命守高平命副

集作制

儒宮朱衣銀魚

象服以崇錫榮考妣孝道上窮官不滿能亦云達通逾

七望八年孰非公

蜀本作踰七八年孰非望公非

在君無憾我意不充

君之昆弟三以詞雄刺史郎官

集作中

四繼三同於士大

夫可謂顯融我之獲見實自童蒙既受誘勸

集作既愛既勸

在

麻之蓬自視鷓鴣望君飛鴻四十餘年事半如夢

集作四十

年餘事  
如夢中

分宰河洛愧立並躬俱苦

集作  
官

於學以纖臨洪

惠詩不酌報德以空死生莫接孰明余

集作  
我

衷於祭告

情文以自攻嗚呼哀哉尚饗

### 祭馬僕射總文

前人

維年月日吏部侍郎韓愈謹以清酌庶羞之奠敬祭于  
故僕射馬公十二兄之靈惟公弘大溫恭全德備天  
故生之其必有意將明將昌實艱初試佐戎滑臺斥由  
尹寺適彼甌閩孰飮跋躓一作躓顛而不踈乃得其地于

泉于虔始執郡符遂殿交州抗節番禺去其螟蠹蠻越  
大蘇擢亞秋官朝得碩士人謂其崇我勢方起東征淮  
蔡相臣是使公兼邦憲以副經紀殲彼大魁厥勲孰似  
蜀本作以丞相歸治留長蔡師茫茫黍稷昔實棘茨鳩鳴雀

乳不見梟鷂惟蔡及許舊為血仇命公并侯耕借之牛

束其弓矢禮讓優優始誅郟戎厥疆

集作墟

腥臊公往滌

之茲惟樂郊惟東有猗惟西有虺顛覆朋鄰我餘有幾  
律萃中居斬其眷尾岱定河安惟公之避帝念厥功還

公于朝昇

蜀本作陟

于地官且長百寮度彼四方孰樂可據

顧瞻衡鈞

蜀本作鈞衡

將舉以付惟公積勤以疾以憂及其

歸時當謝之秋賀問

李邕本作門

未歸弔廬已萃未燕于堂

已哭于次昔我及公實同危事且死且生誓莫捐棄歸

來握手曾不三四曾不濡翰酬酢文字曾不醉飽以勸

酒哉莫以叙哀其何能致嗚呼哀哉尚饗

祭柳州柳員外文

崔羣

惟靈天資秀異才稱雋傑早著嘉名遠播芳烈愬六藝

之要妙踐九流之治切鎔鄣鋒利浮雲可決騏驎逸步  
飛塵可絕閉匣不用伏櫪何施才命罕并今古同悲五  
嶺三湘寒暑潛推樂道忘憂襟靈甚夷揆藻揮毫騫翔  
是期柰何終否神也我欺嗚呼鷗飛半空羊角中戾彼  
蒼難詰善人斯逝羣宿受交分行敦情契遺文在篋贈  
言猶佩撫孤追往泣然流涕子子丹旒翩翩素帷鵬弔  
是月龜從有時路出長阡將赴京師旨酒一觴哭君江  
湄往矣子厚魂期來斯尚饗





文苑英華卷九百八十七